

Mid-Day Dogri News Bulletin, 25th March 2025

समे — 12:25

<><><><><><>

LG-Krishak Mela

उपराज्यपाल मनोज सिन्हा होरें कल शेर-ए-कश्मीर एग्रीकल्चर यूनिवर्सिटी स्कास्ट दे आर. एस.पुरा कैपस च कृषक मेला 2025 च शिरकत कीती ते उन्नत करसानें गी सम्मानत कीता। उपराज्यपाल होरें यूनिवर्सिटी परिसर च चार नमिएं सुविधाएं दा बी उद्घाटन कीता जिंदे नै शिक्षा, अनुसंधान ते करसानें गी सिखलाई देने दे कम्में च बेह्तरी औग। इस मौके अपने संबोधनै च उपराज्यपाल होरें आखेआ जे जम्मू कश्मीर च राई-बाई ते एहदे नै जुड़े दे होरने क्षेत्रें च पिछले किश समें दरान बड़ा मता सुधार ते बदलाव आया ऐ जेहदा श्रेय प्रधानमंत्री नरेन्द्र मोदी हुंदे कुशल मार्ग दर्शन गी जंदा ऐ। उनें इस क्षेत्र च जम्मू कश्मीर गी होर अगड़े लेने दे सरकार दे धेइए गी बी पक्का कीता। उनें दस्सेआ जे इस क्षेत्र दे विकास लेई असें केई स्कीमें ते कार्यक्रमें गी लागू कीता ऐ जिंदे चराई-बाई क्षेत्र दे पूरे पराते विकास सरबंधी कार्यक्रम एचएडीपी बी शामिल ऐ। उनें आखेआ जे पिछले त्रऊं बरे दरान जम्मू कश्मीर च राई-बाई ते एहदे नै जुड़े दे होरने क्षेत्रें च रिकार्ड उत्पादन दर्ज कीता गेआ ऐ।

<><><><><><>

CM-CSR

मुख्यमंत्री उमर अब्दुल्ला होरें कल विधानसभा गी जानकारी दित्ती ऐ जे राष्ट्रीय पन बिजली निगम एनएचपीसी नै जम्मू कश्मीर च समाज लेई अपनी जिम्मेदारी सरबंधी गतिविधिएं लेई 28 करोड़ 67 लख 40 जहार रपे बक्ख रखे दे न जिसलै कि मुख्य भरै च इस चाल्ली दिएं गतिविधिएं लेई बक्ख रखी गेदी कुल रकम 1 अरब 67 करोड़ 93 लख रपे ऐ। आकाशवाणी दे जम्मू संवाददाता नै जानकारी दित्ती ऐ जे विधायक वहीद उर रहमान परा हुंदे आस्सेआ पुट्टे गेदे इक सुआले दे परते च मुख्यमंत्री होरें अगगे दस्सेआ जे एनएचवीसी समाज लेई अपनी जिम्मेवारी तैहत सेहत, स्वच्छता, शिक्षा, हुनर विकास, खेड्डें, ग्रामीण विकास ते आपदा प्रबंधन दे क्षेत्रे च गतिविधिएं दा सरिस्ता करदा ऐ।

<><><><><><>

Dy. CM-Unemployment

उपमुख्यमंत्री सुरिन्दर चौधरी होरें दस्सेआ ऐ जे 2025 दे जनवरी म्हीने दी खीरै तोड़ी 3 लक्ख 70 जहार 81 बेरोजगार नोजवानें अपने नां रोजगार पोर्टल पर दर्ज करोआई लेते न जिंदे चा 2 लक्ख 40 जहार 502 मर्दे ते 1 लक्ख 30 जहार 309 महिला न। आकाशवाणी दे जम्मू संवाददाता नै जानकारी दित्ती ऐ जे विधायक अली मोहम्मद सागर हुंदे आस्सेआ पुच्छे गेदे इक सुआले दा परता दिंदे होई उपमुख्यमंत्री होरें दस्सेआ जे पढ़े लिखे दे बेरोजगार नोजवानें दे नां दर्ज करने दी प्रक्रिया तैहत कम्म रोजगार हासल करने दी इच्छेआ रखने आले नोजवान अपनी मर्जी कन्नै नां दर्ज कराई सकदे न जेह्दे नै उंदी बक्ख स्वरोजगार स्कीमें तगर पुज्ज जकीनी बनी सकदी ऐ।

<><><><><><>

GOC Visit

व्हाईट नाईट कोर दे जीओसी लैफ्टिनेंट जनरल नवीन सचदेवा होरें Conter Insurgency Force(रोमियो) फोर्स बी आखेआ जंदा ऐ, दे जीओसी ते एस ऑफ स्पेड्स डिवीजन दे जीओसी ते डेल्टा फोर्स दे जीओसी हुंदे कन्नै राजौरी-पुंछ सेक्टर दा दौरा लाया ते खित्ते दे सुरक्षा हालात दा जायजा लैता। आकाशवाणी दे जम्मू संवाददाता नै जानकारी दित्ती ऐ जे जीओसी होरें सुरक्षाबलें दी मुश्कल हालात च पूरी तनदेही कन्नै कम्म करने लेई सराहना कीती ते हर मुश्कल दा सामना करने लेई उंदा दिल बधाया। जीओसी होरें इस दरान मजूदा सुरक्षा स्थिति दे कन्नो कन्नी हर चाल्ली दी स्थिति थमां निबड़ने लेई बलें दी तैआरी ते होरने प्रबंधे दी बी समीक्षा कीती।

<><><><><><>

Bangladesh-Genocide Day

बंगलादेश अज्ज जनसंहार दिवस मना करदा ऐ। अज्जै दे रोज 1971 च उस बेल्लै दे पूर्वी पाकिस्तान दे बंगलादेशी नागरिकें पर कीते अत्याचारें ते कतलोगारत गी चेता कीता जंदा ऐ। पाकिस्तानी फौज नै 25 मार्च 1971 गी उत्थें आप्रेशन सर्चलाइट शुरू कीता हा जेह्दे तैहत बांगला लोकें गी बेस्हाब जुल्में अत्याचारें ते हत्याएं दा सामना करना पेआ हा। एह् ध्याड़ा बंगलादेश दे इतिहास च सब्बने शा दर्दनाक ध्याय ऐ जदू पाकिस्तानी फौज नै उत्थें विद्यार्थिएं, टीचरें ते पुलस कर्मिं दा सरेआम कत्लेआम कीता हा।

<><><><><><>

Mughal Road

जम्मू दे राजौरी ते पुंछ जिलें गी कश्मीर दे शौपियां जिले कन्नै जोड़ने आली ऐतिहासक मुगल रोड गड्डिङ्ग दी आओजाई लेई 10 अप्रैल गी खोली जाग। आकाशवाणी दे जम्मू संवाददाता नै जानकारी दित्ती ऐ जे अधिकारिङ्ग दा आखना ऐ जे अगले म्हीने दी 10 तरीक गी इसी गड्डिङ्ग दी आओजाई लेई खोलेआ जाग पर ओहदे कोला पैहले 9 तरीक गी इक ट्रायल रन बी कीता जाग। पुंछ दे डिप्टी कमीशनर होरें आखेआ कि जेकर मौसम साफ रौहग ते इक बक्खी दा आओजाई आला एह ट्रायल रन 9 तरीक गी होग। उनें आखेआ जे मौसम विभाग नै 29 मार्च गी बर्फबारी दी पेशगोई कीती दी ऐ, पर जेकर मौसम खुश्क रौहदा ऐ ते बर्फबारी नेई होंदी ते ट्रायल रन कराने लेई 30 मार्च गी शिड़कें गी साफ करने दा कम्म शुरू कीता जाग। मुगल रोड जनवरी म्हीने भारी बर्फबारी कारण बंद करी दित्ती गई ही।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम च “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>